

**Ղ**արաբաղում շատերն են կարծում, որ նորընտիր օմբուդսմենի անունը շատերի համար այդպես էլ անհայտ կմնա, ինչպես տասնյակ նախարարների անունները: «Օմբուդսմենը»: Եղ հի՞նչ թագա պաշտոն ա, գյուղում չում: Բուլա լի, առաջ ուսերենը իլալ խոսելիս, մինգե անգլերենն ա՞ մոդա», - ԼՂՀ մարդու իրավունքների պաշտպանի ընտրության մեջ իր իրավունքների խախտում նկատելով՝ ասաց թոշակառու Արշավիր Գրիգորյանը՝ կարգադրելով նախ թարգմանել օմբուդսմեն տերմինը մեկ բառով եւ, հետո՝ խոսել պաշտոնի նշանակության մասին:

Մասնագիտությամբ հաշվապահ Արտակ Վարդանյանը գիտի, թե ինչ ասել է օմբուդսմեն եւ կարծում է, որ այդ պաշտոնյան պետք է լինի ոչ տեղացի, սկզբունքային մի անձնավորություն. «Պատգամավորը ո՞նց կարող ա պայքարի իր օլիգարխ ընկերների դեմ, որոնք, օրինակ, աշխատավարձ են տալիս աշխատողներին»: Լրագրող Նաիրա Հայրումյանը նույնպես կարծում է, որ Ղարաբաղում ստեղծված քաղաքական պայմաններում ով էլ լինի օմբուդսմենը, չի կարող անկախ գործել. «Բայց, մյուս կողմից, ընտրյալը քննարկվող թեկնածուներից ամենահաջող ընտրությունն է պրոֆեսիոնալ առումով, հատկապես, որ վերջին շրջանում պրոֆեսիոնալիզմը Ղարաբաղում պակասում է», - պարզաբանել է «KarabakhOpen» էլեկտրոնային թերթի խմբագիրը:

Հիշեցնենք, որ մի քանի օր առաջ ԼՂՀ խորհրդարանի գաղտնի քվեարկությամբ օմբուդսմեն եր ընտրվել արդեն երկրորդ անգամ ԱԺ պետաիրավական հարցերի հանձնաժողովի նախագահի պաշտոնն զբաղեցնող Յուրի Հայրապետյանը: ԼՂՀ 53-ամյա օմբուդսմենը կուսակցական է, մասնագիտությամբ իրավաբան եւ երկար տարիներ զբաղեցրել է տարբեր բարձրաստիճան մասնագիտական պաշտոններ: ԼՂՀ

մարդու իրավունքների առաջին պաշտպանն իր առաջին հարցազրույցը սկսեց՝ խախտելով լրագրողիս իրավունքները՝ թույլ չտալով միացնել ձայնագրիչը: Իմ դժգոհությանը նա ընդառաջեց միայն՝ իր ասելիքը շատ դանդաղ թելադրելով: Ստորեւ ներկայացնում ենք օմբուդսմենի առաջին հարցազրույցը, որում նա այդպես էլ որեւէ կոնկրետ ու համարձակ պատասխան չհնչեցրեց:

**- Ձեր կարծիքով, ինչո՞ւ եր պետք ԼՂՀ-ում օմբուդսմենի պաշտոնը:**

- Մեր պետության համար մարդու իրավունքների եւ նրա հիմնարար ազատությունների պաշտպանությունը գլխավոր գործառույթներից մեկն է, որը գրված է ԼՂՀ Սահմանադրության 5-րդ հոդվածում: Մարդու իրավունքների պաշտպանությունը մինչեւ օմբուդսմենը կատարում էին իրավապահ մարմինները: Օմբուդսմենի անհրաժեշտությունը բխում է մեր Սահմանադրությունից: Պարզապես այս ինստիտուտը ստեղծելով՝ իրականացրել ենք սահմանադրական պահանջը:

**- Ո՞ր խնդիրները հատկապես կառանձնացնեիք, որոնք այդ պաշտոնին է վերապահված լուծել:**

- Օմբուդսմենի ինստիտուտը կարգավորվում է թե Սահմանադրությամբ եւ թե մարդու իրավունքների պաշտպանության օրենքով: Օմբուդսմենն իր լիազորությունները կատարելիս ղեկավարվում է ոչ թե իր կամ մեկ ուրիշի ցանկությամբ, այլ՝ օրենքով:

**- Ձեր կուսակցությունը խորհրդարանում ամենախոշոր խմբակցությունն ունի: Ինչպե՞ս եք փորձելու իշխանությունից անկախ գործել:**

- Ոչ թե փորձելու եմ, այլ ես ունեմ անկախ գործելու իրավունք, քանի որ Սահմանադրության մեջ ամրագրված է, որ մարդու իրավունքների պաշտպանը կախված չէ որեւէ մարմնից կամ պաշտոնատար անձանցից: Պաշտպանի պարտականություններին խո-

չընդոտելը, նրան սպառնալը քրեորեն պատժելի են:

**- Ո՞րն է լինելու Ձեր առաջին անելիքը:**

- Նախ, մտածում եմ աշխատակազմի մասին, որոնք հետ համատեղ պիտի աշխատենք: Եւ ուզում եմ այնպիսի մարդկանց հավաքեմ, որոնք կլինեն ազնիվ, պրոֆեսիոնալ, բարեխիղճ, անաչառ: Այնքան համարձակություն ունենան, որ, երեւան հանելով կոնկրետ պաշտոնատար անձի կողմից թույլ տրված խախտումը՝ ձեռնարկեն համապատասխան միջոցներ:



**ՂԱՐԱԲԱՂՈՒՄ ՆՈՐ «ՕՄԲՈՒԴՆԵՅ» Է ԸՆՏՐԿԵԼ**

**- Իսկ Դուք ունե՞ք ձեր թվարկած հատկանիշները:**

- Ըզըը... Ես հուսով եմ, որ այն պատգամավորները, որոնք քվեարկել են իմ օգտին այս պաշտոնում նշանակվելու համար, տեսել են իմ մեջ այդ ամենը: Բացի դրանից, ես ունեմ բավականին մեծ փորձ, որը ինձ թույլ կտա այս դաշտում աշխատել:

**- Կարո՞ք եք մատնանշել մեկ ոլորտ, որտեղ կան ակնհայտ խախտումներ:**

- Նման ոլորտ նշել չեմ կարող: Ոչ թե զգուշանում եմ կամ թաքցնում, այլ պարզապես եթե լիներ, ես ձեզ հետ հարցազրույց տալու փոխարեն կզբաղվեի այդ խնդրով:



Լուսինե ՄՈՒՍԱՅԵԼՅԱՆ